

Plenu Constitución Corporación Municipal 2007-2011

Gijón/Xixón 16 de Xunu de 2007

Entama güei un nuevu mandáu que surde por decisión de la ciudadanía de Xixón, que'l pasáu 27 de mayu decidió colos sos votos que **nengún de los partíos qu'equí tamos representaos ganara les eleiciones**. Naide pue falar de ganar nes eleiciones pasaes porque nenguna de les nuestres fuercies algamó'l so propósiu. Per un llau, la derecha, que, como fai 32 años, busca la mayoría absoluta, subió más de 5.000 votos y un conceyal, pero quedó a cerca de 20.000 pa consiguir esti oxetivu; nel otru llau'l PSOE que tamién fizo una campaña pola mayoría absoluta y que tampoco l'algamó, perdiendo amás cuasi que 3.000 votos y nengún conceyal. Izquierda Xunida-Bloque por Asturias-Los Verdes perdimos un 11% y 1.700 votos, y con ellos un conceyal; coses de la **Llei d'Hont**, que fai que se dea'l bipartidismu de les fuercies mayoritarias en toles esferes del país. Si analizamos los resultaos podemos atopar que se repite otra vegada'l fenómenu de **l'abstención**, que nestes eleiciones algamó casi un 40%, con niveles desiguales nos distritos, pudiendo conseñar un **67% de votación nel distritu 1^u frente a poco más del 57% nel distritu 5^u**. Esta situación debería facenos pensar, anque de xuru que l'esmolecimientu nun va ser compartío por tolos Grupos Presentes nesta nueva Corporación.

Tamos nuna **campaña electoral bipolarizada dafechu**, como si se tratara d'unes primaries, centrada n'alderiques que nada nun tienen que ver col ámbitu municipal nin autonómicu. Nesti contestu d'interés por facer del bipartidismu la estratexa común, y de xuru que pol mieu a contrastar les llinies programátiques col modelu de ciudá; tanto'l PSOE como'l PP **dexen fuera a la tercer fuercia política** d'esti conceyu, la coalición Izquierda Xunida-Bloque por Asturias, grupu qu'amás, tuvo desendolcando xeres de gobiernu nos caberos cuatro años.

Al mesmu tiempu, ábrese una nueva llexislatura na Xunta Xeneral que tien de tener la Reforma del Estatutu ente los sos primeros oxetivos. Una reforma que contemple un nuevu **Pautu Llocal** que puxe pola autonomía municipal y el municipalismu. Asina, los ayuntamientos garrarán fuercia en competencies que como la d'una Alministración más averada a la

ciudadanía; un nuevu Pautu que de nuevos pasos en materia de descentralización de competencias, **un Pautu Llocal pa un Xixón fuerte, pa un Xixón de futuru.**

Tenemos d'empobinar los nuestros esfuerzos nesta materia p'algamar los niveles europeos.

Superar el ruin 13-14% que los Presupuestos Xenerales del Estáu aporten a les arque municipales pa llegar a esi 33% que supón la media de los países de la Unión Europea. Teniendo pa ello la participación del conceyu na xestión de los Tributos d'Asturies, medrando'l porcentaxe que los Presupuestos Xenerales dediquen a los Ayuntamientos, asina como afitando nueves midíes que miren por un Ayuntamiento fuerte y con recursos; col fin d'ufiertar más y meyores servicios públicos a la ciudadanía.

Izquierda Xunida-Bloque por Asturias-Los Verdes apostamos durante'l pasáu mandáu pol mantenimientu de la industria tradicional de la nuestra ciudá, ente otros polos Astilleros. **Los Astilleros y el Tallerón.** Pa ello l'adaptación del Plan Xeneral reafirma qu'estos espacios tán contemplaos como suelu industrial, y asina van seguir si tamos a la escontra de cualquier maniobra estraña sobre estos terrenos, tan prestosos pal sector del lladriyu y la especulación. Ábrese'l momentu de pensar na soberanía enerxética, poro, enantes de someter a **Mina La Camocha** al pieslle definitivu debe aldericase sobre'l so futuru, y la rellación de Xixón cola minería'l carbón.

Nel mandáu anterior, IX-BA-LV llegamos a lo cimero de la nuestra **oposición a l'ampliación 3C del puertu d'El Musel, el Muselón,** algamando una ampliación portuaria consensuada, una ampliación que va facer qu'una de les marques d'identidá de la nuestra ciudá, la playa de San Llorienzo, nun se convierta nun banzáu d'agua salao.

Queremos un Musel con futuru, un puertu modernu, xuníu a los principales puertos europeos, un puertu a la gueta de nuevos tráficu, contenedores... y que tenga les instalaciones afayadices pa estos. **Un puertu conectáu cola otra gran área portuaria asturiana,** col desdoblamientu de l'antigua carretera d'Avilés (AS19) dende L'Empalme hasta'l puertu d' Avilés, pasando pol corredor de Tabaza, llibrando d'esti mou l' autopista *Y griega* del tráficu pesáu y

perigroso, que güei supón la comunicación interportuaria, y que cola futura ampliación supón l'absoluta saturación d'esta vía.

Y falando de nuevos tráficós, de nueves comunicaciones pa Xixón y El Musel, yá ye hora de volver a les negociaciones pa la creación d'una llinia de **ferri que xuna Xixón cola banana industrial europea**. Una llinia que xuntando los tráficós de mercancíes y de pasaxeros traiga nuevos mercaos a la nuestra ciudá.

Ún de los aspeutos que más preocupación supón pa Izquierda Xunida-Bloque por Asturias-Los Verdes ye la llucha por un Xixón industrial.

Pa ello proponemos l'aprobación d'un **Plan Industrial p'Asturies**, nel que se defenda a Xixón como motor industrial de la comunidá autónoma, un Plan empobináu, sobre too, a les PYMES, que se desarrollen cola participación activa de tolos axentes implicaos nestos procesos, dende los sindicatos a l'Alministración Municipal, pasando poles AA. Empresariales y Cámares de Comerci.

Nel mandáu viniente **pondráse en marcha un espaciu industrial** que va convertise nuna realidá, nun espaciu industrial insertáu nel entornu, respetuosu col mediu ambiente, bien comunicáu, que valdrá d'elementu creador d'actividá pal nuestru conceyu, y que xunto a les nueves árees industriales planificaes supondrá un elementu que va facer espoxigar l'actividá tanto en Xixón como n'Asturies.

Apostamos **pol emplegu estable, de calidá y con drechos, como exa fundamental del nuestru sistema de bienestar**. Pa ello apostaremos pol fortalecimientu y l'ampliación de los **Planes d'Emplegu Municipales**, col envís de meyorar les condiciones llaborales englobaes dientro'l pautu "Xixón Emprende" nun nuevu pautu que supere l'anterior. Pa finar, ye'l nuestro oxetivu pa esti mandáu la necesidá de mantener unes rellaciones llaborales coherentes, y coordinaes, nel conxuntu del "Grupu" Ayuntamiento de Xixón que pide llegar a algamar un Alcuertu Marcu.

Les empreses de Xixón tienen de competir nun mercáu cada día más globalizáu, nel que la calidá de los productos ye cada vegada más importante, poro, l'Alministración Municipal tien d'apostar pol I+D+I de les empreses xixoneses, fundamentalmente la pequeña y mediana empresa, verdadera base de la economía y l'emplegáu, acordando los convenios necesarios cola Universidá pa esti fin.

Un recursu básicu y, que va siendo más estratéxicu pa la calidá de la vida de la ciudá ye l'agua. La so importancia ye capital, y nun ye ésti'l llugar nel que falar de les sos propiedaes beneficioses, anque sí l'espaci u nel qu'abrir los alderiques necesarios pa la so conservación, la so distribución, la so xestión. Defendemos un **consumu responsable**, la reutilización, la depuración terciaria de les agües residuales. El serviciu de saniamientu tien de xeneralizase, bien acabando en plena conexón col sistema colector del **Plan de Saniamientu Integral de Xixón**, como ye'l casu de Los Campones en Tremañes, o con un saniamientu llocal igualmente integral, como reivindicamos pa otros barrios y parroquies. Nesti sen Izquierda Xunida-Bloque por Asturias-Los Verdes sigue pidiendo axilidá pa la construcción de la **depuradora de la zona Este** de la ciudá, que faiga posible'l tratamientu de los desechos d'esta cuenca del conceyu.

Un modelu de ciudá pa vivir, pa disfrutar dende la superficie.

Nun supón una novedá que diga equí q'Izquierda Xunida-Bloque por Asturias-Los Verdes **tamos a la escontra d'un metrotren** que nunca nun se reclamare pola ciudadanía, y al que nun tardaron en subise dende les files del PSOE pese a que finara nun solar en metanes de la nada; de toes formes IX-BA-LV apostamos por allargar esta llinia hasta'l Campus y l'Hospital de Cabueñes, llugares a los que se supón va dar más serviciu.

Del mesmu mou tornamos col nuestro plantegamientu, defendíu durante años en solitariu, pa que'l Plan Integral del Ferrocarril cuente tamién col **soterramientu de les vías hasta Veriña**. Una apuesta que va posibilitar el desdoblamientu de l'Avenida Juan Carlos I dende'l Puente La Braña hasta Puente Secu de Veriña.

Defendemos una ciudá abierta y tresparente, un **tranvía** que conecte dende Roces a la Estación Intermodal, pasando pel Humedal, contribuyendo a **da-y vida en materia ferroviaria a tol área central asturiana**. Un tresporte pa la ciudadanía, respetuosu col mediu ambiente, rápidu y modernu, qu'asitie a Xixón ente les

ciudaes cabezales na xestión de la movilidad ciudadana. Un **tranvía públicu xestionáu por EMTUSA**.

El drechu a la vivienda tien d'espeyase na actuación municipal. Asina nun ye casual que durante'l pasáu periodu la Empresa Municipal de la Vivienda desarrollare la so mayor actividá, conxuntamente cola Consejería de Vivienda. Llegó'l momentu de que la **Empresa Municipal de la Vivienda entame a promocionar la Vivienda** con dalgún tipu de proteición, nun dexándola namái como una xestora d'ayudes o promotora de concursos pal so accesu.

La **especulación** a la que ta sometíu esti drechu, **nun-y dexa exercer un exerciciu real**, polo que ye fundamental activar les ferramientes afayadices pa fomentar, dende l'Alministración Llocal, la integración nel mercáu de la vivienda desocupada.

Asina mesmo esta corporación municipal tien qu'adoptar el compromisu de construir como mínimu **5.000 viviendes embaxo dalgún réxime de proteición** nel próximu mandáu; siguiendo d'esti mou la política entamada nel mandáu anterior.

L'Ayuntamientu de Xixón será, dentro del so ámbitu de responsabilidá, el promotor y xestor de **polítiques medioambientales** enfotaes na proteición y recuperación del mediu ambiente: aforru y usu sostenible de los recursos, implantación d'iniciatives empobinaes al cambéu de les enerxíes tradicionales por enerxíes renovables, reutilización de recursos como forma de consumu razonable, concienciación de la ciudadanía pa col comportamientu respetuosu col mediu ambiente. Garantizando como Ayuntamientu que tolos organismos y empreses que d'él dependen se comprometan con unos estándares medioambientales afayadizos cola filosofía que defendemos. Adoptando y poniendo en marcha como ferramienta de trabayu, l'Axenda 21 y el Manifiestu de Llangostera de Febreru del 2003.

Les **polítiques educatives**, nes sos diferentes estayes, recibieron un fuerte puxu durante'l pasáu mandáu municipal, puxu que **tien de tener continuu durante los próximos cuatro años**. Pa ello l'Ayuntamientu nun pue quedase como un espectador pasivu ente les decisiones de la Conseyería d'Educación. Izquierda Xunida-Bloque por Asturias-Los Verdes quier un **ayuntamientu fuerte y con capacidá competencial** pa intervenir nos modelos educativos que s'apliquen en Xixón.

La conceyalía d'educación, como amosamos nos cuatro años anteriores, nun pue ser una simple estaya na cadena de tresmisión. Queremos una Conceyalía d'Educación implicada na ciudá, con **capacidá pa xestionar tolos programes educativos** que se faen nel conceyu.

El Conseyu Escolar de Xixón, nel ámbitu de l'autonomía municipal, tien d'exercer un control efeutivu sobre los peligros de la concentración y masificación escolar. Va ser necesario da-y a esti muérganu ferramientes tales como'l nomamientu de la **Comisión d'Escolarización** de la ciudá, promoviendo la so capacidá pa empobinase a instancies tales como'l Parlamentu Asturianu y la Conseyería d'Educación, col oxetivu de que s'estudien les propuestes. Amás ye necesario que participe na planificación de les actividaes complementaries y estraescolares de los centros.

Nesti contestu les **escueles infantiles de 0-3 años** han de seguir avanzando cola creación pal próximu mandáu de **4-5 centros más**, como mínimu. La **integración** de les tres redes d'escueles 0-3 qu'hai na ciudá, nuna **rede única dependiente de la Conceyalía d'Educación**, tien que ser una prioridá pa esti mandáu.

Na mesma llinia hai en Xixón una bona rede de centros públicos, rede que va quedar perfeicionada cola creación d'un **gran colexu nel centru la ciudá**, pa lo que desiximos la priesa necesaria pa entamar a dar los primeros pasos, que concreten y resuelvan esta perimportante demanda.

Dende Izquierda Xunida-Bloque por Asturias-Los Verdes consideramos a la cultura como ún de los factores cimeros na calidá de vida de la ciudadanía. La nuestra propuesta sobre'l futuru de la vieya **Fábrica de Cimavilla ye nidia, queremos un gran centru cultural**, un centru que por drechu propiu camude nuna referencia pa les artes asturianas. Nesti sentíu proponemos que la **Filmoteca Asturiana** tenga nesti espaciu la so sede definitiva, abellugando asina mesmo la **Film Commision** pa la xestión de dellos proyeutos cinematográficos en rellación a una ciudá como Xixón tan apareyada históricamente col cine. Tamién contemplamos abellugar dientro d'esti gran espaciu cultural, y nel contestu del so plan d'usos, los espacios necesarios en rellación a la **memoria social** de Xixón.

Nun podemos escaecer el problema de llibertaes provocáu pol non reconocimientu de la **Oficialidá de la llingua asturiana**. Dende esti ayuntamientu tenemos qu'enfotanos nes polítiques necesaries pa garantizar un usu normalizáu del asturianu nes rellaciones ente la ciudadanía y la so alministración, pa garantizar que **nengún xixonés puea sentise discrimináu pol usu de la so llingua materna**.

Por ello'l mandáu qu'entama güei va desenvolver les midíes que faiga falta pa la normalización social del asturianu, aprobando pa ello unes **Ordenances Municipales** que regulen l'usu de la llingua nel Conceyu.

Ye poco'l tiempu que tenemos y queden asuntos abondos, munches lluches, nel tinteru cuestiones cimeres, la política de mocedá, la igualdá real de drechos ente homes y muyeres... Aspeutos perimportantes pal nuestro modelu de ciudadanía y que, como vien faciendo'l nuestro grupu municipal, va seguir desarrollando con un oxetivu que nun ye otru que'l de la llucha pola llibertá y los drechos.



Nun quiero finir ensin da-yos les gracias a toles muyeres, homes y mozos qu'otra vuelta depositaron la so confianza en nós. Y a los que con toa seguridad nun vamos deceicionar. Munches gracias.